

La Quotidiana 20-9-2013,p. 2

Surpiglià il dretg federal davart il sport da muntogna e da naiv

(cc) La regenza ha concludì ina revisiun parziala da las disposiziuns executivas tar la lescha davart il sport da muntogna e da naiv. Qua tras vegnan stgaffidas las disposiziuns chantunales necessarias per exequir a partir dal 1. da schaner 2014 il nov dretg federal. Ina revisiun da la lescha chantunala davart il sport da muntogna e da naiv duai vegnir fatga en in segund pass, previsiblmain per il 1. da schaner 2016. Fin la fin da l'onn 2015 valan anc transitoricain las permissiuns chantunales tenor il dretg vegl resp. las scolaziuns chantunales reconuschidas en il sport da muntogna e da naiv.

Il nov dretg federal regla differentas activitads (sco guid/-a da muntogna, aspirant/-a da guid da muntogna, magister/-tra da sport da naiv, magister/-tra da rampignar e manader/-dra d'excursiuns; canyoning; riverrafting/canutar en torrents; bungee jumping) che vegnan purschidas professionalmain en in tschert territori cun in potencial da privel pli grond (muntogna, territori grippus, auals, flums). Ils chantuns ston reglar las cumpetenzas e las proceduras concernent la permissiun e la persecuziun penala, far las inscripziuns en ina banca da datas e fixar las taxas. Ultra da quai dastgan els relaschar restricziuns d'access per tscherts territoris sco er in inventari da variantas cun turas e cun descensiuns. L'inventari da variantas mussa tge scolaziun resp. permissiun che vegn premissa tenor il dretg federal per tge varianta da skis. L'inventari n'è betg definitiv e n'ha betg in caracter giuridicain liant. Turas da skis, da snowboard e da gianellas na figureschan betg en l'inventari da variantas.